

四庫全書

史部

欽定四庫全書

史部

宋名臣奏議卷四十三

詳校官侍講_臣王燕緒

編修_臣裴謙覆勘

總校官進士_臣繆琪

校對官中書_臣潘庭筠

謄錄監生_臣劉墀

欽定四庫全書

宋名臣奏議卷四十三

宋 趙汝愚 編

天道門

災異十

上神宗答詔論彗星上三說九宜

呂大防

元豐三年七月二十五日詔中書朕以寡昧獲奉宗廟夙夜祇畏不敢康寧冀或仰

當天心感格和氣以敷錫于庶民而太史
占言謫見乾象乃孟秋癸未彗出西方災
異之來厥有攸召夫豈朕德弗類刑政或
謬於理歟吏之不良而民或失職歟永惟
厥咎朕甚懼焉自今月戊子避正殿減常
膳中外臣寮並許直言朝政闕失朕虛心
以改庶幾古先格
王正厥事之意焉

臣伏覩七月二十六日手詔以彗出西方責躬引咎敷
求讜言以正厥事臣伏讀感歎以為天道難知不可隱
度今聖心恐懼退託損抑有以見不諱之朝度越前古
臣愚不肖雖吏守外藩不敢不布肝膈少裨萬一伏惟

神明幸察臣竊以為方今政事之急謾為三說九宜上
冒天聽一曰治本二曰緩末三曰納言治本之宜有三
一宜養民漢之傳國至昭帝而六世藩臣之變外戚之
禍數矣唐之傳國至明皇而六世如漢之變而又有巨
盜之患今大宋之臨御而陛下之繼統世數與漢唐同
而曾無一方之患其得人心可見矣苟非累聖德澤涵
養深厚視之如傷愛之如子則何以固結其心若此伏
自陛下布行新政以來參酌古今著為良法便民者為

不少矣而民情戚戚不以為安推原其端蓋緣朝廷措置大率急於公家而緩於民事竊觀先王之政上之憂下也深則下之報上也厚故其詩曰駿發爾私終三十里上憂下之詩也雨我公田遂及我私下報上之詩也上下之情其相親如此則怨惡不順何由生乎其間哉故馬周之對太宗以為貞觀初匹絹易斗米而人不怨者知陛下憂之也五六年來匹絹易穀十數斛而民怨者知陛下不憂之也此言極要頗同今日之意臣試舉

其一二免役錢本率衆以給傭公家無所利其入今所
在猥積至有一縣之人出者半贏者半而取之不已遇
水旱未嘗有所蠲減貧下未嘗有所貸免此民情戚戚
之一也市易本以抑兼并使衆業而公利在其間民有
艱急匱乏之期方之他取於富室則無倍稱之息然吏
或不良乘民之急而掊克無已徒欲收贏取償而不顧
事體之宜與法令之本意誘陷無賴子弟以墮產者有
之予民者高其物估以巧取息者有之一物也朝貴賣

而夕賤買者有之此民情戚戚之一也保甲者先王什伍教民之法也不專為兵而已今有司惟以坐作進退射藝精粗為急而不問推行考察姦盜去惡獎善之意而又富者逸而貧者勞或遇饑饉則將有流散不可號召之虞此民情戚戚之一也凡此特法令之未備或吏奉法不謹之過以陛下之聖明而修正之宜無難者二宜教士舜九德文王作人周公三物皆為先王教士之實今聞以才選者矣未聞以德進也聞以文詞選者矣

未聞以行進也臣竊以非大變其法則終不能得教士之實其變法謂何責之郡縣監司保任其才行以升於尚書各試其所知而命之則士勸於善不專以文詞設科則士業崇本凡此一改法令則天下從之矣以陛下之聖明而修正之不五六年必收其效二宜重穀自古國家之患未有不緣民飢而起也今縣官積錢所在貫朽而倉廩至無半歲之實誠可憂也蓋自常平之法行而羣司各計其利故轉運司唯有租稅征科之入而已

其歲入既不足以充費故于儲蓄之計雖欲賤糴而不暇為也常平雖有折納歛糴之法而吏多不能推行萬一水旱方千里則積鎰之饒將無用而民之彊者衆而為盜弱者流離溝壑而無以救矣臣近嘗上乘歲豐積穀之議頗合事機而亦可行於久遠伏望裁察凡此特法令之未備或吏奉法不謹之過以陛下之聖明而修正之宜無難者緩末之宜有二一宜緩治夷狄中國本也夷狄末也先王之政內諸夏而外夷狄夷狄之國聲

教所暨故舜之命官猾夏者治之然則不為中國患者
王者不治也或者謂夷狄之地可闢而郡縣之夷狄之
民可冠帶而賦役之竊謂過矣以四海九州之廣而欲
沙漠不毛之地以為富以兆民多士之盛而欲左衽鳩
舌之人以為衆徒見有糜敝所重而未見其可也雖有
前代喪失之地苟非民情來附未足以用衆一宜緩治
兵兵者先王所治而非所以為先也衛君問陳於孔子
而孔子答以俎豆之事蓋禮教有所未修而先之以軍

旅之事則語道非其序也今刑政雖講而未可謂盡中
禮樂雖修而未可謂盡善教化雖布而未可謂盡行然
則今日之政宜有急於兵者焉凡此非可廢之事特在
陛下施為之有先後而已以陛下之聖明留意而條別
之宜無不得其序者納言之宜有四一宜廣言路古者
羣臣人人得諫故曰工執藝事以諫工尚諫則餘可知
矣所謂爭臣七人者在位皆諫諫而又當必爭者有七
人而後可今陛下虛心待下未嘗大聲以色而諫者未

始有聞於天下諫而必爭者未始見其人方唐太宗之時當亡隋之後人物寡少而諫者滿朝今陛下承累世文明之盛而遂使史筆無書諫諍之事亦可謂闕典矣二宜寬侵官之罰凡人臣之居外見不便於民有害於政者大者聞諸朝小者以其職而行之是也今一切禁止不使相侵則朝廷必有不聞之事而民庶必有失職之苦矣三宜恕誅謗之罪自古有為之君更制天下之事未有不被毀訾於世者以盤庚之明周公之聖而不

免況其下者哉蓋衆人者常情不達義理樂因循而憚
改作改作之始未見其利而翕然非之聖人于此特恕
其無知而寬之可也豈足以與之較量長短是非哉故
漢文深知其意直除其罪以度容之而已苟設峻令以
防之非不遽止然愚庸之情不自知語言之過而非其
上矣四宜容異同之論古者袞服之飾必以黼者取其
兩已相背而能成政也兩已相背至銘諸躬而日服之
以為監有以見人君御臣之深戒在于喜同而惡異也

舜伐三苗禹以為可益以為不可然不害並為九官周公相成王召公不悅然不害同為十亂洪範謀及卿士則三公之論有不用焉周官詢及萬民則卿士之謀有不取焉夫然後可以通達衆志輔成大業苟取其所同而捨其所異則晏子所謂以水濟水孰能食之者也非特如此而已苟欲其同則必有誕謾詐欺以附同者矣苟惡其異則必有詭隨面從以免異者矣使人臣皆懷誕謾詭隨以事上殆非朝廷之利也竊聞議者必使廷

臣無異論乃謂之一道德為此說者似不思也夫一道德以同俗者蓋謂典常之教不可不同也今以政事之殊有可有不可有宜有不宜有損有益而必一而同之恐非聖人之意也所惡異論者豈非以其沮議害事而惡之耶苟尊之使言而擇之在我則雖有沮議害事之言在吾所棄固不能為患也凡此無難改之勢而有速應之實蓋在陛下為之而已如前所陳蓋陛下政事之形容於外者臣得以揣度而陳之至如陛下聖性之淵

微君德之崇厚惟幾以成天下之務惟深以達天下之
志臣之愚陋莫得而測焉伏惟仰觀天心旁考古義絀
竒論而用中道則天下幸甚

元豐三年八月
上時直舍人院

上神宗荅詔論彗星上三說九宜

邢恕

臣恭惟皇帝陛下實天祚宋誕生明聖有超卓絕異之
姿爰自毓德宮闈仁心仁聞載在羣口及初嗣位動率
禮法承順兩宮左右就養發於誠孝遠近內外凡厥臣

庶莫不矜式太皇太后厭世陛下號慟泣血百僚在位
不覺隕涕入臨而出轉以相告有識咨嗟長老嘆息山
陵復土外雖變禮從吉而陛下悲哀未怠宮中實服三
年夙夜念治躬親政事小大之臣咸各率職十有四年
未嘗一日少懈後宮燕遊聲色嗜好無所聞園囿弋獵
輿馬馳騁無所幸方且闢闔乎乾坤而步驟乎帝皇其
視天下如一家中國如一人其設心操術豈待問哉仍
年以來威福自出惟所指顧莫不服從曾未謦欬莫不

響應赫赫巍巍朝廷益尊四方萬里盜賊消戢閭里安堵陛下誠因此美即此善據此勢藉此時以之上當天心則可使寒暑平風雨時三光軌度以之下順地理則可使五穀熟庶草茂山川晏寧至於景星出卿雲見甘露降醴泉涌鳳凰麒麟可使皆在郊藪天人之際其形氣有以相通其變動有以相感格之以誠應之以實密與道俱則其荅猶影響其合猶符節也如此則何災不可消何異不可去若夫祈禳小數豈足道哉昔宋景公

一諸侯耳出人君之言三熒惑為之退舍況於陛下之仁聖智勇履席南面之勢不出殿堂之上而廣制海內尺地莫非其有一民莫非其臣者哉以誠感天曾不移刻以德退星曾不旋踵此臣所以殫志畢慮不量其愚不避見嫉之嫌而願畢其惓惓也伏惟陛下留神加察焉踈遠小臣未嘗得日望清光奉承德音也然而間從公卿大夫之後竊聽於進見下風者皆以謂陛下才高天下智出物表既妙思六經而多識前載旁羅百氏典

章制度律令敕式靡不淹洽工作器械算數米鹽無不精密神機天辨變化無窮退而鮮不自失夫人心畏怯則智勇皆廢雖朝暮禁閤陟降殿陛密近親習之臣猶且趑趄愧恐唯諾聽從之不暇無能有所開發建明以補助萬一況于單賤鄙陋之人乎雖天之高不可階而升日月之可仰無得而踰性與天道不可得而聞然匹夫匹婦之於聖人有所與知一有不獲自盡民主罔與成功以大舜之智而自耕稼陶漁以至於為帝無非取

人以為善以孔子之聖而獄訟文詞可與人共之者不獨有焉則所謂聖智者曷嘗掩衆人之所能而咸蓋羣心之所知哉衆人所見而有以處之使各效其長羣心所知而有以擇之使必從其是竭天下之才力盡天下之思慮然猶有所不及而後聖人奮其智能則所以待之者盡矣其所得者博矣其所守者約矣已而有迹其長緣其是則天下之人莫不興起為之於其才力之所不給計之於其思慮之所不獲則天下之人莫不厭服

何必耗血氣疲精神一切親事於法宮之中然後為得
哉臣竊仰陛下之天德常若太高而或不下接朝廷之
舉事常若太速而謀之常患不博雖陛下之聰明睿智
百舉百中而愚者千慮之一猶恐有所遺也況或纖芥
闕漏畧於彌縫而汗渙已施機張已發則誰敢出身試
臨不測而輕議於既往哉且夫履四海之盛位襲五世
之極治又有冠古之稱絕俗之事此乃全盛光大之時
君子之所以尚消息盈虛也意者陛下或有而矜之所

謂日中則昃月盈則食盛衰損益之機其在是矣故易之明夷以莅衆既濟思患而預防此古先哲王所以安而不忘危存而不忘亡治而不忘亂日新厥德以祈天永命也昔唐太宗自負其文武材畧以為實兼將相然不知帝王自有體下兼將相不足為能不若漢高祖豁達面諭羣臣吾不如子房蕭何韓信也方是時彗星亦嘗變見而太宗悟焉曰吾自謂三王已來撥亂之主莫吾若故負而矜之輕天下士上天見變其謂是乎夫謂

古人為莫吾若而輕時人則上下之情不通而無所不至惟太宗為能知悔而又有魏徵王珪劉洎馬周之徒更戒迭諫然後貞觀之治庶幾三代之風而豈亦不能為災何況陛下盛德至誠避殿損膳深自引咎以來讜言放出宮女以防隔塞虛心克己效於事實豈特太宗之比哉予以收視反聽澹然與神明俱而默與造化為友端拱無營優游自得付物以能委任責成情偽之變事物之來有道以揆有節以察不勞而成不動而化魚

享堯舜之名永保喬松之壽上以奉寧七廟慰釋皇太后之心下以幸惠羣臣而錫為蒼生福則何變異之足憂哉抑臣又聞惟德動天無遠弗届而天地之大德曰生董仲舒亦曰刑主殺德主生則修德者莫若好生也朝廷近歲屢起詔獄深識遠見之士竊量陛下聖意之過欲大畏民志究盡事實及至便殿親決時亦有所縱舍郡府奏讞大辟類率從生非必專欲求殺也然而治獄之吏典法之官但見追逮不絕恐不能無妄意朝廷

便私自營冀傲盡力首公之名而規闊畧縱出之責則
必至於滋蔓刻核失出蓋鮮則失入有之及至上奏請
決鍛鍊已成文致已白囚人雖有懷鬱抑而不得伸朝
廷雖欲加寬厚而無所施則是豈國家之意哉臺寺深
嚴自非事守相關焉知其詳然法者設於有罪而使惡
人知畏也今無罪者或不自保而善人亦懼矣此臣所
以疑也臣知京師玩習久安大抵懈弛而嚮者貴近狂
於恩幸不知畏法方陛下勵精為治有以督過訓齊之

誠是也然而矯枉者貴直矯枉過直則是曲而已孟子曰今之與楊墨議者如追放豚既入其茆又從而招之誠使百司自此莫不飭厲而貴近益遵約束然且求之不已則是亦過直而招之之類也書曰寬而有制從容以和在易之節曰苦節不可貞先王之所以繩檢羣下未嘗無制也然必寬之使赴功有餘地從容而不迫遽故和樂而無憔悴節之為卦君子所以制數度議德行然至於已甚過中苦而不甘不可以通行持久失其所

以為正是故先王議道自己制法以民也誠以陛下天縱之才日躋之德慮靡不周而志罔或倦舉以程能課事而厚望之於羣臣磨以歲月則鮮不破漏傾覆失其所操持行義有跌于繩墨之間而譴訶有軼於度量之表矣易曰窮則變變則通詩曰四牡騤騤六轡如馳臣意陛下洞達事機時措之宜必有以變而通之如王良造父御馬緩急控縱而歸和平固已得之於精神之會心術之微然臣直以耳目所接言之不能無過計也獄

吏法官制在陛下視以好惡惟所寬恤易若覆手至於興甲兵之大投民於鋒鏑之間措之矢石之下以其死爭一跌而不振則雖有仁智之心不能救患於已然而消禍於既往是故帝王之師必出於萬全攻不必取不苟勞衆戰不必勝不苟接刃蓋以養國威全人命也近者瀘南之舉師出不為無名以陛下之威武將吏鼓勇軍士思奮校之以計若老成人之策孺子角其有餘不足若孟賁之拉侏儒檄馳鋒接萬全必勝而獨克然臣

得之傳聞不知是否以謂蠻徼山林阻險道路狹隘溪澗隔絕吏士羊腸魚貫不輕得進地饒瘴疫令人頭痛身熱漚泄霍亂而中州之人不服習其水土使蠻稍桀黠聞大兵將至則逃遁而不出旅距而不可入曠日引久留而不決士卒暴露疾病死亡者衆而餽餉或不給師老械敝浸成遷延不然逆類醜徒上下救死為首尾之勢旁近種落相與唱和有唇齒之援舉熊羆之士而輕用其鋒以與獫狁之民角逐於崎嶇偏束潭淖翳蒼

之間以幸頃刻之勝廝養下卒有一不脩於行間雖能
梟馘其首領繫繫其徒黨猶不若多算遠御以全制其
弊也如有師倦而歸蠻或連結諸種呼嘯並出蜀地狹
而人稠雖遇大熟食猶不足比歲錢積於官市用少而
益貴米不加多而益賤則農人困矣蜀之所恃以界限
蠻夷者山林也今承平日久而虞衡之屬時禁不講界
上之民私相交易往來往往有微徑潛通道路故號為
險狹者今率行牛林木故可以為障塞者今皆盡行斤

斧不幸而歲饑食不足錢不可以多得本末俱困山林之阻故不設脩屬有姦民鄉導外寇表裏俱發郡縣又闕守備則唐之南詔前世之均順豈可以其無能哉古人有言兵者凶器一方有急四面皆從今蜀雖號富饒為朝廷外府以內外輕重較之則手足標末也五路天下之腹心根本也河北陝西河東又皆控帶戎虜率計義勇保甲籍勝兵不減七八十萬然則三路尤為天下之捍蔽祖宗寬假邊民稅或不及分河北特弛鹽禁誠

知天下有急三路最持其重三路不可動搖則天下之勢常安而他皆坐受其利故切封疆捍壁壘輓齎奉饗數履危難之地者則急其力而緩其財守墳墓安鄉里不識戰鬪之事不知死亡之憂者則急其財而緩其力利害之相權勞逸之相均勇怯彊弱之相資多寡有無之相濟蓋未有兼責而獨得者也祖宗初定天下所以任戰者皆黥面之兵固未有義勇保甲也猶且恤之若此況今日乎誠宜先擇三路之守令優為勸獎之法稍

稱職者且使久任俾得以拊循其民即安田里因其暇
日隸習戰守捐其逋負寬其力役平居無追須勞苦之
歎則緩急可責其效死果得民兵之實則西北之敵且
畏威矣民誠效死敵誠畏威則邊鄙不聳兵刃不頓不
過几席之上樽俎之間可以挫四夷因其亂亡之時踐
其機投其隙鼓之以道德征之以仁義誘之以恩信則
可箠食壺漿以迎王師扶老携幼以歸聖德鞭撻不施
況血刃乎方天變之來陛下過意抑損即有以反求諸

身又有以固結其民酌輕重之宜謹先後之施則夏遼
異黨蠻貊荒忽可使歸命向化矧惟宮殿之內左右密
勿常從宿衛之臣乎至若推廣象類而修舉恩澤之政
以導迎善氣惟陛下所擇非小臣所得一二言也臣屬
近在輦轂之下首聞詔音猥先衆人而言陛下赦憐不
誅使能言之士得以繼進則四海九州之博內外臣民
之衆方九德咸事之時安知不有指陳世故極於天人
之分達於古今之宜足以上荅聖心抑塞星變者哉則

是臣於國猶為有補也

元豐三年八月上
時為館閣校勘

上神宗答詔論彗星上三說九宜

呂大鈞

臣伏讀詔書寅畏天變引過罪已數求美言以新盛德
誠意惻怛發於心畫自以消變除慝况諫行言聽膏澤
逮下必將感召和氣溢為嘉祥臣愚恨無精識與學啟
寤天聽徒有淺聞近見二事或可以少裨萬一伏惟聖
主留神裁察幸甚臣聞詩書所稱古先哲王雖清明在

躬俊人在官猶孳孳不倦延禮臣下講求至道之要而
推行之夫至道之要莫切於堯舜之言其言曰人心惟
危道心惟微此言至簡至要古之人君莫能盡行故常
為中材之所忽而獨上聖能勤行者也然則人心者人
君之所日用時出以應萬務者也其神明恍惚其出入
無時其作於中而見於外也邪正糾紛頃刻萬變其危
如是安得不日夜存養寧息使之感物應變無所差失
乎道心者人心之所默識躬行以立大本者也凡有生

之民無衆寡小大無彼我莫不體之以為吾心就其間
涵容存養以生吾誠其道茫昧難以言諭惟忠信默會
庶幾近之稍或不明則離而不一其微如是安得不閑
暇燕處求索推明克己體物常使純一則仁義禮智油
然根於中晬然見於外然後為得乎故言動之所發政
令之所加始出於善而其終常流為不善凡此者皆人
心不安而易變故也誠意之所存行義之所履始若充
盡其終常至於天下不為一家中國不為一人凡此者

皆道心不明而易失故也由是言之此二心者非有一物也特體用之殊耳使人心一於道心則自不危矣使道心一於人心則自不微矣今乘陛下勵精反己之時謂宜博延德義之士儲精垂思相與講求至道之實使浩然之氣充塞天地則何患濬哲不生而明德不暢乎此臣之所謂淺聞者此也臣又聞天下衆人言謂陛下躬勤庶政日不遑暇而有司奉行多不盡理陛下遠略方外軍政修舉而將帥出征多不諭旨陛下勸獎人材

揀拔倚注而或不得其人陛下優假言事之臣未嘗深
譴而近日內外望風畏怯莫敢有言青苗免役所以寬
民力而下戶凋瘵日甚常平儲峙錢穀所以足國用而
有司經費日窘訓齊保甲所以禁暴而盜賊如故增置
官局所以革敕而文書益煩異時歲饑糴貴小民常取
倍息之貴亦能自給今年豐官出輕貸而束手受困異
時富商大賈豪奪細民而不甚為苦今市易均輸平準
而負益深凡此皆臣之近見者也然推見其本而求之

豈有他哉惟知道心之實則見此時之敝矣傳曰惟道
集虛陛下既明發德音虚心待物則道豈難知哉古人
謂顧力行何如者此在陛下一動心之間耳可不深念
之乎

元豐三年八月上
時為宮邸教授

上哲宗論亢旱

劉摯

臣伏見自入冬以來並無雨雪亢陽為沴被災甚廣羣
情嗷嗷驚憂四顧考原經典可謂大異夫人之氣與天
地陰陽之氣相為出入流通而往來者也人情和於下

則天道順於上人事乖於此則天變效於彼是謂天人相與之際也故聖人之事天也知其在上不遠應以類至則凡祈禳消災以為末節小數而專修政事以應之竊以陛下委國仰成與之均休戚同榮辱者不在三省樞密院執政之臣乎今廟堂之上大臣八人情志乖睽謀謨不一無同心同德之節有分曹懷貳之意故議政之際排拒依違相激相鬪其語往往播在中外所以政令壅隔而不下文書稽滯而不行官爵濫於無名而不

應於典故公道過於貴近而獨施於疎遠私邪朋比上下隔并況當皇帝陛下淵嘿諒闇之日太皇太后陛下制出房闥之時朝廷政權盡在大臣而大臣不協如此故天下但聞頗僻之事而不見和善之政政不和則人情不和人情不和則天地之氣繆戾而生此變也書曰肅時雨若五行傳以謂冬旱政舒緩之所致也今上下可謂不肅朝廷之政可謂驕慢廢弛號令可謂二三不振以古者災異水旱咎在變理陰陽之官故策免三公

以塞其譴今來歲已窮盡早暵如此宿麥在野無潤澤
之入春氣相乘有疫癘之變生民一歲之大命豈可不
念之哉又一月以來日青無光風霾昏翳考之占驗皆
非小變而上之人恬不以為怪此中外之所以恐懼而
不寧也伏望聖慈深省上天儆告之意俯察朝廷乖戾
之變特詔大臣修飭政事凡賦斂之害人者法令之未
安者必解而更張之至於決獄訟之私枉趣諸司之稽
違進忠良退阿諛通壅蔽去疑貳務以至誠實事上塞

天譴下救生民則和氣之應將不旋日而得之矣臣不勝惓惓之心

貼黃外議皆謂朝廷自升祔後來政事懈弛不及

日前此蓋有以召之非虛言也

元豐八年十二月
上時為侍御史

上哲宗論華山摧

梁燾

臣竊聞華州秦鄭縣界小敷谷山摧損覆居民者臣按春秋傳曰國主山川故山川之變聖人以為至戒而深懼然變之來也或考之人事而相符或稽諸君德而不

類要之皆有天意顧世主所以應天意者何如耳應之
得其道則轉禍而為福失其道則反安而為危詩曰百
川沸騰山冢率崩高岸為谷深谷為陵此人事相符之
變也然幽王曾不以為卹故詩人哀之曰胡憯莫懲書
曰湯湯洪水方割蕩蕩懷山襄陵浩浩滔天此君德不
類之變也然帝堯自以為戒故命禹之辭曰洚水儆予
臣竊伏思陛下即位以來尊用耆哲登崇雋良納天下
之善常若不及革天下之弊惟恐不至以百姓之心為

心撫而念之不啻父母之於赤子也四海內外物情人
意和樂而舒徐巍乎太平之象矣宜乎美祥嘉瑞交至
而迭應今反有山摧之異者何也臣見天心之仁愛陛
下欲以篤佑聖治日新又新以盛無疆之休故於未然
深示警告願陛下仰思天心而內自勵曰予臨兆民固
懔懔乎無不懼矣豈尚有言動之際忽而不恭者乎公
言直道固無間而上下交矣豈尚有諛辭邪說反易是
非汨吾之明者乎正人君子固並進而朝廷清矣豈尚

有不肖渾淆其間亂吾之真者乎天下固安矣豈尚有宿蠹深弊遠而難燭隱而不知或欲改而復存或已除而又作動人之憂者乎四疆固靜矣豈尚有惜虛名而甘實弊以養後患未為至計者乎爵賞不為不謹也姑息以害公僭差而紊正者一能絕歟刑賞不為不平也當罪而縱宜直而枉者有不察歟政令不為不明也煩而寡要輕出而易反以惑民之聽者審於思歟力役不為不省也用而不切偏而弗均者究之至歟郡邑之治

不為不飭也任非其人過王澤而不流病吾民者知之
盡歟仰願陛下因天之戒凡此類者益加意焉臣愚不
勝惓惓昔梁山崩晉侯以傳名伯宗伯宗以重人之言
告而晉侯從之以自責春秋賢之夫晉侯列國之君而
梁山一國之望耳其變也猶能亟召賢者而謀之況陛
下有天下之大華山又五嶽之崇乎其可不畏天之威
思所以應其變也伏惟陛下鑒周之失體堯之言采晉
之善博資賢人之謀修飭政事以答天戒社稷幸甚天

下幸甚

貼黃臣伏思華山西方之鎮國家倚之以安靜者也今而崩摧必有天意願陛下深加省懼不以為

忽天下幸甚

元祐元年十二月同侍御史王巖叟上熹時為右諫議大夫

上哲宗論旱為不肅之罰 王 覲

臣聞書曰惟吉凶不僭在人惟天降災祥在德夫人君之德配乎天地而協乎陰陽者也故災祥之來皆隨其德古之人君每見災異則退而自省以修德焉乃可以

變災為祥轉禍為福伏見去歲以來旱災屢作今春涉夏亢陽尤甚陛下焦勞惻怛精意祈禱靡神不舉而又傾倉廩之積以賑飢省土木之工以寬役親錄囚徒赦過宥罪宜可以致雨矣而雨猶未也然則天意亦必有在矣謹按洪範之五事一曰貌貌曰恭恭作肅見於休徵則曰肅時雨若也夫人君外既有恭莊以著於貌內必有肅欽以生於心然後施於政事一皆主於肅欽則百官羣吏四方萬里莫敢不肅而天應之以時雨此天

人相與之際如影響也恭惟陛下春夏以來凡可以致雨者無所不講而雨猶未應意者肅欽之道或有所未備乎陛下起居語默多在深宮之中非愚臣所得而見其見於政事者臣得以言之也夫中都之官雍容養望者多而紀綱浸隳諸司之吏驕慢玩法者衆而鞭笞罕及此京師官吏之不肅也監司妄意朝廷厭於督責者以苟簡為適時郡縣妄意朝廷主於寬大者以縱弛為得計此監司郡縣之不肅也國之凶人可誅竄以明國

之刑者或阻格於大臣之言民之巨蠹可黜削以釋民之怨者或稽留於典吏之手此刑罰之不肅也令出惟行弗惟反今發號出令或數日而追或累月而變者此號令之不肅也廣西新州之役以兵將邀功無事受戮者千餘人遠方之民銜冤無訴矣而久不正其罪此軍政之不肅也河北塘泊之險以大河橫流漲為平陸者數百里敵騎之來將通行而無礙矣而莫有任其實者此邊吏之不肅也凡政事之不肅者類如此而求所謂

時雨順之不亦難哉夫仁恩豈不可致雨而肅欽乃可
以致雨者何耶蓋肅然後仁恩可行也朝廷不肅則小
人肆而下有受其弊者矣政事不肅則萬事隳而民不
保其生矣夫如是且將亂之不暇尚何仁恩之有況可
以感天心而致雨乎惟肅欽然後政事修而仁恩行乃
所以致雨之道也然則言動之不可以不肅者臣願躬
行之政事之不可以不肅者臣願深圖之庶幾乎雨可

致也

元祐二年四月旱甚覲言陛下必欲有以感天意
即乞下詔責躬以其未能肅欽以致不肅之罰也

然後詔三省以振朝綱去民賊詔樞密院以嚴邊防治軍政詔六曹寺監以修職事載胥吏詔御史臺以舉不職詔監司以察縱弛詔郡守以戒偷惰凡政事之不肅者皆修舉之如此而雨猶未降臣甘嚴誅以為妄言之戒不報繼上此奏時為右司諫

上哲宗論水旱乞許羣臣面對言事

蘓轍

臣伏見二年以來民氣未和天意未順災沴荐至非水即旱淮南饑饉人至相食河北流移道路不絕京東困弊盜賊羣起二聖遇災憂懼傾發倉廩以救其乏絕獨

此三路所散已近二百萬斛矣異時賑卹未見此比然而民力已困國用已竭而旱勢未止夏麥失望秋稼未粒數月之後公私無繼羣盜蜂起勢有必至臣未知朝廷何以待此臣竊見太皇太后陛下清身奉法與物無私皇帝陛下恭默靖重動由禮義皇天后土照知此心和氣不應深所未諭不審陛下嘗究其說否臣聞天氣下降地氣上騰陰陽和暢雨澤乃至君廣聽以納下臣盡言以奉上上下下交泰和氣乃至今二聖居幃箔之

中所與朝夕謀議者上止執政大臣下止諫官御史不
過十數人耳其餘侍從近臣雖六官之長皆不得進見
而況其遠者乎臣以謂羣臣識慮深淺不同其心好惡
亦異故須兼聽廣覽然後能盡物情而得事實今陛下
聽既不廣則所行之事不得不偏聽狹事偏則陰陽亢
隔和氣不效必然之理也臣觀祖宗故事百官有司皆
得以職事進對從容訪問以盡其情今二聖臨御四方
引領望治而謙恭退託踈遠羣臣不行人主之事遂使

百官不敢以職事求見臣謂宜因此時明降詔書許百
官面奏公事上以盡羣情之異同下以閱人才之賢否
人心不壅天道必從則久旱之災庶幾可息臣蒙國厚
恩比聞詔書引咎自責避正殿損常膳分命臣僚並起
羣望私心踴躍不敢違寧輒推天意人事影響之應庶
幾有補萬一惟陛下恕其愚僭畧賜采擇

元祐二年四
月上時為中

書舍
人

上哲宗論陰雪

蘇轍

臣伏見自去冬至今陰雪繼作罷民凍餒困斃道路聖心憂勞何所不至蓋嘗命有司發內庫之錢出司農之粟竭太府之炭以濟其急矣猶未也則釋犴獄罷役夫凡可以惠民之事無不為矣而天意不順雨雪如故臣竊惑之臣嘗觀先儒論五行之說以為聽之不聰是謂不謀厥咎急厥罰常寒故周之末世舒緩微弱政在臣下則天應之以燠煖秦之末世峻刑暴斂海內重足而立則天應之以寒慄是以周亡無寒歲秦滅無燠年信

如此言則朝廷之政令豈失於急歟竊惟二聖臨御以來革弊去煩施惠已責凡所措置雖未盡得而民獲其所欲者多矣苟以為急雖三尺童子不信也然則陰雪之應其咎安在臣聞商高宗雉鳴於鼎其臣祖已告之曰惟先格王正厥事夫所謂正厥事者無常事也惟因其非而正之耳故臣竊推之古事以為天大雷電以風而成王應之以逆周公衛國大旱而文公應之以伐邢夫親任三公非所以止風而興師伐人非所以致雨彼

既為之不疑而天亦報之如響者誠得其時當其事耳
臣竊惟近者天地之變常半歲苦旱半歲苦陰陰陽之
氣一有過差浸淫爛漫而不能反今雨雪既甚久不止
則春夏之際又將復旱此其類似有以致之者古之為
政德刑並用寬猛相濟使天下懷其惠而畏其威民氣
充塞而天地從之故陽不過而陰不忒自頃年以來朝
廷之政專以容悅為先務上下觀望化而為一監司之
臣以不執有罪為賢郡縣之官以寬弛租賦縱釋酒稅

為優至于省臺寺監亦未聞有正身治事以辦集聞者也何者朝廷方兼容是非以不事為安靜以不別白黑為寬大是以此極也臣竊惟朝廷之意其始蓋欲以寬大治民耳而不知姦臣猾吏乘其間以侵虐細民其弊不可勝數名雖近寬而其實則虐也陛下誠欲消復此變宜訓敕大臣使之守法度立紀綱信賞必罰使羣下凜然知有所畏苟朝廷無偏甚不舉之政則陰陽過差浸淫爛漫往而不返之氣宜可得而止也不然雖空

府庫竭倉廩以賑貧窮破圉圉焚鞭朴以縱罪戾臣恐上天之意未易回也臣待罪地官以簿書米鹽為職出位而言罪在不赦然陛下頃自疎外擢臣而用之二年之間致位於此豈欲責臣齟齬以吏事自效而已哉是以冒萬死獻言惟陛下裁擇

元祐二年二月上
時為戶部侍郎

上哲宗論歲旱地震星隕 劉安世

臣伏見陛下即位以來于今五載承天順地仁民愛物德澤洋溢施乎方外元元鼓舞歌頌不暇固宜陰陽順

序風雨時若諸福協應百嘉蕃昌而歲比不登和氣湮
鬱饑饉流徙災害頗衆今春乃旱暵為虐京畿西路二
麥失望農民嗷嗷且又菜色雖陛下惻然軫念靡神不
宗疎決繫囚降從寬典而沛然之澤終未告足又陝西
河北屢聞地震大星晝隕其光燭天旬月之間巨異仍
出臣聞天人之際精祲有以相盪善惡有以相推事作
乎下象動乎上陰陽之理各應其感陰感則靜者動陽
蔽則明者晦水旱之災隨類而至此皆天心之仁愛人

君而先出災異譴告警懼使之兢畏修省而不至失道之敗也臣竊謂上天之體雖高而聽卑明主所應惡文而尚實與其為祈禳之小數不若圖銷變之大方願陛下夙夜祇畏側身修行特下明詔以是罪已又許中外臣民極言政事之闕失專委近臣考求其當以施有政庶幾下情不至壅塞其諸路災傷州縣流民所至並委守令多方賑濟無俾捐瘠申勅緣邊帥臣及捕盜官吏常切警備以戒不虞今日已前內外營造土木之役苟

非要切並乞停罷分命監司按視留獄公卿輔弼同寅
協恭以思天變開衆正之路塞羣枉之門誠備災之善
經應變之至務也昔宋景公小國之諸侯爾有不忍移
禍之誠出人君之言三熒惑為之退舍陛下之明聖發
於誠心精意感通何求弗獲臣待罪諫列日聞焦勞輒
效愚忠庶裨萬一惟冀聖慈少賜采納不勝幸甚

元祐四年

三月上時
為左正言

宋名臣奏議卷四十三

欽定四庫全書

宋名臣奏議卷四十四

宋 趙汝愚 編

天道門

災異八

上哲宗論日食

梁 燾

臣聞日者衆陽之長人君之象也以清明溥照為德而不容蔽虧侵掩之為患一有此變則君德傷矣乃今春

以來蒙濁霧翳不見清明之景者跨六十日間得一仰
賜潔則欣欣然物榮而人喜今又食于五月之朔為變
亦已甚矣詩曰彼月而食則維其常此日而食于何不
臧傳曰月食非常也比之日食猶為常也日食則不善
矣惡其主君之占非太平之象也臣竊為陛下憂之亦
以為陛下之賀也自古衰亂之國必有日食星辰之變
而日食為之最此臣所以憂也自古明昌之君逢災遇
變飭躬寅畏應天以誠終回答謫不損為聖此臣所以

賀也恭惟陛下以上帝眷命早有天下並明文母臨制
四方退託謙恭無所專斷言動中禮不聞過舉何其天
鑒昭昭示戒如警失道敗度之君甚可畏也或者陛下
以盛妙之年居崇高富貴之位養心之道猶未加焉故
天心垂以譴告欲陛下飭躬寅畏應之以誠則除災而
集福矣臣願陛下思所以銷變之理而上悅天心夫銷
變之道莫如修德修德之要莫如進學進學之敏莫如
專志志專於為善則氣定性復聰明日開真積力久為

聖益聖夫如是可迎天地之眚揚祖宗之休災害不生禍亂不作澹然高拱坐擁古隆之符矣董仲舒有言曰天之仁愛人君欲止其亂自非大亡道之世天盡欲扶持而全安之事在彊勉而已彊勉學問則聞見博而智益明彊勉行道則德日起而大有功此皆可使還至而有效者也詩曰夙夜匪懈書曰懋哉懋哉皆彊勉之謂也陛下以堯舜之資聖敬日躋加以好學之志當為太平有道之主天之顧諟感應純佑豈止仲舒之所稱

者亦在陛下勉之不懈而已夫帝王之學當知其大者
遠者不在辨章析句總攬纖微歲蕤文章滂沛議論屑
屑若儒臣之為也所謂遠大者豈無要耶臣謹獻其略
夫明王可以靈承上帝者莫如敬臣願陛下事天以敬
明主可以得四海之歡心者莫如孝臣願陛下奉親以
孝使羣臣之喜樂盡忠者莫如信臣願陛下御臣以信
使百姓之家給人足者莫如仁臣願陛下養民以仁使
政事惟醇不令而行者莫如勤儉臣願陛下治己以勤

儉使左右安寧中外附豫者莫如寬宏臣願陛下容下
以寬宏敬天之事蓋多端也非學無以究至誠之實孝
親之事蓋多端也非學無以盡愛敬之力信臣之事蓋
多端也非學無以辨邪正之情仁民之事蓋多端也非
學無以達富壽之術勤儉之事蓋多端也非學無以適
中道之用寬宏之事蓋多端也非學無以識敦大之體
惟其進學則盡之矣伏惟陛下屏遠聲色親近書史宮
中清燕日深記誦退朝之餘經筵之外間召講讀侍臣

咨訪講議不必務求多速常使日力有餘暇而致精樂
而忘倦日就月將自成廣博克勤于學則德明而君道
彊不勤于學則德微而君道弱君道之弱雖無災異足
為懼畏君道之彊雖有災異可以銷伏惟陛下誠能存畏
天之心發進學之志天心聽之忻然降福蒙濁之咎終
無辰月之驗薄食之變必有雲雨之應精意所感吉符
是隨上寬太母憂勞保護之慈下副中外欣戴瞻望之
願享國永年比隆仁祖此宗社之慶臣民之幸也臣天

與朴忠向亦自竭今不敢以在外疎遠少怠愛君之誠

狂直之言惟陛下財赦

元祐六年四月
上時知鄭州

上哲宗論月食

王巖叟

臣伏見去歲日食五月朔今歲月食三月望且食之既按十月之交詩曰日月告凶不用其行四國無政不用其良傳曰國無政不用善則自取謫于日月之災故政不可不謹也又曰彼月而食則維其常此日而食于何不臧考吉凶之言則日月之食以為戒考維常之語則

若專戒日食而不以月食為可畏蓋詩人之時事異於
今今方兩宮同聽天下之政實日月並明之道俱不當
有薄食之變也臣竊惟皇帝陛下以光明純粹之德淵
默臨朝太皇太后陛下以仁義公恕之行發而為政蓋
無一不當天心者然則何為謫見于月食之災臣殆恐
陰邪道長有以蒙蔽盛明而聖心不以為疑故天見變
異以示警戒此天心之仁愛陛下而欲全聖德之美也
消復之應宜在此時願陛下用人之際則審邪正使必

得其真聽言之際則察是非使必歸於當斥遠陰類深防蒙蔽之害以荅天意臣愚不勝幸甚

貼黃臣按漢歷志記月食之既者率二十三食而復既按元豐八年八月望嘗食之既今固未及二十三食而復既則是不當既而既臣故恐天意之有以深警陛下也陰邪之人所以難辨者其言似忠而非忠其行似直而非直依正以為邪傍公以為私非深考其素履察其誠心旁質以公議潛觀

其所立則未易辨也故人主不可不加意於用明

以防陰邪之蒙蔽也

元祐七年三月上時
為簽書樞密院事

上哲宗論畏天

范祖禹

臣前上仁皇訓典願陛下法則仁宗宜以至誠好學為
先今因進講月令聖人奉天之事臣竊以畏天者莫如
仁宗願陛下先誠於事天臣聞聖人之事天也非在於
七日戒三日齋執圭幣以享圓丘之時也天之佑聖也
亦非在於祭則降福之時也聖人無一日而不事天天

無一日而不佑聖人昔堯授舜舜授禹曰天之厯數在爾躬夫帝王之興受天眷命豈一朝一夕哉由其積行累功素合於天也堯有聖神文武之德故天命以為天下君孔子曰惟天為大惟堯則之所以事天也元亨利貞乾之四德君子行仁義禮智以法之天地之大德曰生聖人之大德曰仁天叙有典故奉之以五典天秩有禮故奉之以五禮天命有德故奉之以五德天討有罪故奉之以五刑賞有德罰有罪皆天之事非人君之所

得私也故官謂之天官民謂之天民官不可以非其人
民不可以失其心易曰大人者先天而天不違後天而
奉天時夫能使天不違者奉天之至也仲虺之誥曰天
乃錫王勇智聖人聰明淵懿皆天所與豈可不學以奉
天乎湯誥曰爾有善朕弗敢蔽罪當朕躬弗敢自赦唯
簡在上帝之心言人有善已有過皆天所知不可誣也
聖人推此心於天下故其德合於天伊尹曰惟尹躬暨
湯咸有一德克享天心夫一者何惟誠而已不誠則有

偽故不一不一則無以享天心又曰非天私我有商惟天佑于一德非商求於下民惟民歸於一德天之所佑民之所歸惟誠而已召誥曰今天其命哲命吉凶命歷年命哲則有智有不智故不可不一于學命吉凶則有禍有福故不可不一于德命歷年則有永有不永故不可不一于仁此皆所以事天也詩曰文王陟降在帝左右言文王升降動靜皆合天之意也又曰昊天曰明及爾出王昊天曰旦及爾游衍言天之與人君出入游處

不可不畏也夫天之與人同一氣耳故民愁則天為之
戚民悅則天為之和書曰天視自我民視天聽自我民
聽是也恭惟仁宗深體此意是以能誠於事天誠於畏
天臣伏見自去冬郊祀以來天人協應風雨時若有豐
年之祥此乃皇天享祐陛下至誠之所感也而自中春
以來暴風雨雪寒氣過甚節令不時豐年之祥復未可
必夫天之於人君亦猶人君之於臣下也小過則戒敕
之若其不改然後責罰加焉人君觀小異而不儆戒則

大異將至矣是以洊雷震則君子恐懼修省迅雷風烈孔子必變敬天威怒也惟陛下戒之謹之無忽天地之小異側身修德以銷大異於未然則天心常悅人心常和四海幸甚

元祐八年三月上
時為翰林學士

上哲宗論日食

范祖禹

臣伏見今月一日日食不盡如鉤見者駭懼以為數十年來日食之異未有如此之甚者也臣聞日食者陰侵陽臣侵君也自古陰盛陽微小人浸長虧損人君之明

則謫見於天日為之食陛下初御前殿聽政月朔之日
皇天見異以儆聖心雖言語丁寧不過於此矣陛下所
宜恐懼修省以答天戒深思變異之來殆由人事有以
感致之務在安靜以寧人心夫天人之際相去不遠應
若影響不可不畏能應之以德則災變而為福異變而
為祥不能應之以德則重違天意何由消弭臣恐邪人
佞臣欲寬陛下聖慮或言日食自有定數又云天道遠
而難知此乃小人誤國之言非聖人畏天之意也惟陛

下留神省察

紹聖元年三月上
時為翰林學士

上哲宗答詔論彗星陳四說 陳 并

紹聖四年九月二日詔曰朕以菲德奉承
大業夙夜戰栗不遑康寧惟恐不足以仰
當天心以羞先帝乃仲秋之夕彗出西方
推原經典茲謂大異永惟其咎未燭厥理
豈非庶政之失以悖三光之明譴告之來
朕實祇懼書不云乎惟先格王正厥事已
避正殿損膳罷秋宴公卿等各悉心修政
輔朕不德應中外臣寮等並許直言朝廷
闕失朕將親覽虛心以
改庶幾以銷天之變焉

臣伏承詔書以彗星西見大赦天下許中外臣寮直言

朝廷闕失此陛下敬天愛民罪已好諫之至也臣聞主
聖臣直臣備員江外山縣窮僻之地心念朝廷不敢隨
衆唯唯輒陳愚見商書曰惟吉凶不僭在人惟天降災
祥在德天下之治安常以聽直言近正人公喜怒消朋
黨明法度節財用謹興兵不事游觀不邇聲色不急功
利不惑佛老非獨治安也榮莫大焉天下之危亂常在
於逆忠直近纖佞私好惡縱朋黨紊法度費財用好攻
戰事游觀惑聲色急功利尚佛老非特危亂也辱莫甚

馬陛下稟堯舜聰明之資聖德學問日益光明求賢納諫聲聞中外然進用之人或緣不用已而執仇或觀望大臣而陰助或元祐持兩端竊位幸用之人伺意希合豈免偏私臣昨聞勝朝堂不得附會言事其熙寧元豐無問賢不肖其所行無問是不是則目為同心稍言非是便相語以指斥先帝則為乖背中書舍人葉濤謂觀文殿學士安燾為無甚過則以濤為非奪職知光州權中書舍人沈銖以戶部侍郎吳居厚為聚斂掊克之人

繳還詞頭則以銖為踈羅織罰金夫詞臣以言而被責
臣下又不得越職言事臺諫為陛下耳目官可以言而
不言則是言路壅塞下情不通利害不達非太平之道
也乃者彗星見於西按漢歷志有掃除之象又云其炎
或短或長內為後宮之害外為諸夏之禍又記齊景公
彗星見而泣晏子曰君無德於國穿池沼則欲深以廣
也為臺榭則欲高且大也賦斂如攘奪誅戮如仇讐彗
星之出庸可懼也是時孟皇后廢天意驗於上必當以

人事驗於下聖心恐懼徹膳避殿赦宥辜罪求言悔過
中外聞之率皆鼓舞知陛下因變而增修其德如周宣
之側身修行而弭災宋景公出人君之言而星退舍真
皇咸平間有妖星見營室北詔令臣下極言得失仁皇
以葑出亦嘗下詔求諫陛下今日所行以周宣宋景為
不足學而稽祖宗之盛言路開闢聖政日新忠臣義士
將接迹而出遭際有道誰惜危言然臣聞諂諛軟熟之
言易於聽無益於治忠鯁法度之言逆於耳有補於時

譬如良藥雖苦口而利於病焉臣不避斧鉞之誅竊謂
缺失其大有四中宮廢居瑤華姬妾寵盛一也逐臣未
見牽復臣下互立朋黨二也百官趨時而迎合臺諫觀
望而不言三也廷臣好談兵邊將喜攻戰四也所謂中
宮廢居瑤華姬妾寵盛者臣試言之陛下日象也皇后
月象也日之與月天地陰陽相資之理而坤無以承乾
則無以母儀天下一旦置之瑤華宮中外駭聞且舜使
堯女能盡婦道文王以御始于寡妻今閭巷賤夫尚以

出妻為恥況陛下為天地神明之主言而為天下後世
法行而為天下後世則朝行乎一堂之上暮傳之四方
萬里之遠夫婦之道體合乾坤理于風化豈可容易廢
黜臣聞有過則誅若無過惡不過詰責詰責不已不過
放之別館誘掖誨諭使之改悔設有忤旨不過猜妬乃
婦人之常情今幽置瑤華外宮以為罪大也則不寘之
死以為罪小也則不應終廢且未聞別降詔選后天下
疑之臣亦竊以為疑慶厯中仁皇欲廢郭皇后為庶人

司諫范仲淹諫曰后者所以長陰教而母萬國不宜以過失輕廢且人孰無過陛下當論后之失放之別館擇嬪妃老者侍之俟其悔而復宮書奏不納明日又率其屬伏閣論列上遣中貴人押往中書商量宰相順旨以漢唐有廢后故事仲淹曰上天資堯舜相公奈何以前世弊法累盛德御史中丞亦與宰相廷辯其非仲淹以言事出后廢瑤華宮其後上嘗密召郭后后欲宰相召百官立班受冊方拜命今陛下規摹所期直欲在堯舜

之上豈宜復用漢唐下衰之時已弊之故事耶后決無大過也自可再冊后令復宮以協天人之願以正乾坤之位以著日月之象諒陛下非不知此遲遲未肯召者必左右毀之也必寵愛蔽之也內則閹官嬖倖助言其非外則百執事之人順以為是下不能躋上於唐虞之盛而致陛下於有過之地以漢唐之弊法同其稱臣竊為陛下不取也願陛下俯回天鑒復正中宮之位使後日史冊全美天下幸甚所謂逐臣未見牽復臣下互立

朋黨者臣試言之陛下以妖星譴告深自戒懼大施曠
蕩之恩有罪之人咸得自新至於殺人情輕尚獲全宥
滌濯收召和氣奈何被逐之臣尚未牽復人情未順天
意亦乖元祐名曰垂簾其實陛下自總機務事皆奏可
然後得行一時大臣念嘗為陛下左右輔相雖趨向乖
背不為無過古人言投鼠忌器元祐之改更為形比先
帝則今日有所行亦不無形比陛下理宜顧惜國體乘
此大需應遠竄舊臣召還近地漸復其職天下皆知其

過陛下容而貸之是增益陛下天德之大內外諸臣不復分黨此一舉而數善得也臣元豐中擢進士第元祐中實不蒙召用今日亦不敢干進故言之無嫌蔡確之死當時士大夫私曰此太皇太后之意也臣下無復敢言今劉摯蘓軾之徒放之嶺表瘴癘之地呂大防死於半途范純仁置之遠地其他棄逐紛紛不可勝數士大夫又曰上意也臣下又無復敢言是過則稱君善則稱己非所謂忠也夫人所學所守各自有趨嚮不能齊也

在朝廷用不用如何爾舜之命禹欲征有苗益以為不可周公之東征羣臣異議獨十夫以為可王恢韓安國之論征伐張湯汲黯之同朝封倫魏徵之論法度皆各有所見人擇其可而用之未聞加罪於異見之人陛下天容地受父生母育無一民非王民也無一臣非王臣也雷霆之怒不當於臣下計較如天地之於萬物溥施無報父母之於子有教無棄此天下陛下之天下陛下之天下乃祖宗之天下前後用事大臣乃藉利勢利器

恃為己私公肆喜怒以得勝為快訕訕紛擾自為朋黨
非天下福也臣願陛下召還逐臣選用正人改法行事
姑務安靜朋黨既消則朝廷日尊人心既協則和氣日
生天下幸甚所謂百官趨時而迎合臺諫觀望而不言
者臣試言之唐太宗有房杜為相有王魏善諫近世如
仁宗朝容納諫諍其甚切直者量行貶謫近不過三兩
月遠不過半年例行牽復或遂召用如此則忠臣肯言
義士感激無所顧忌所以得聞缺失保守太平陛下繼

人主守成之大業堯父舜子重規疊矩文經武緯聖作
明述可謂已盛已盈矣已盛者必善守已盈者必善持
宜其憂勤兢畏以保無疆之休幸天誘陛下之清衷韜
養聖資有不言之敏德不怒之神威終之以禮樂無以
復加矣傳曰治天下之要莫若靜今用事言事之臣不
求安靜以酬恩怨為急百官之中少識廉恥貪愛爵祿
務肥妻子者紛紛如也其間尊君愛國以忠義名節自
期千百之中無二三人且以近事言之王安石為相門

下客常不下數百人安石罷相則移之呂惠卿之門惠卿貶黜則移之吳充王珪蔡確之門逮元祐則移之司馬光之門光死則移之呂大防之門大防出則又移今日執政之門宰相意在東則東意在西則西欲財利則財利欲邊事則邊事隨事變轉隨口止落今之人材卑汙如此甚可恐也能言元祐之非能順執政之意者薦之登對其次堂除不能言元祐之非不能順執政之意者送歸吏部雖有忠臣義士無因得言無路得進近者

所用言事官非執政門人則其親故同里之人言人之善必視君相意旨之所必喜言人之惡必視君相意旨之所必惡助恩助仇至有章疏屢上不報而不決去就或以不敢言而求他職或以親老不可言而求外補臺諫削弱風憲不振良以所用非其人之所致也如侍御史董敦逸司諫郭知章乃是元祐用事之人在元祐則不言元祐之非所以能安其身逮紹聖之後爭言元祐所用所行無一事是乃獲安其身此兩面之人操兩可

之說非所謂一心事上者也鄉原之徒君子切齒而二人偃然居之不自羞愧使陛下不聞過失助百官以報恩仇敦逸知章負天下甚矣如皇后廢而未復逐臣久而未還聚斂之臣復進閹宦用事內降妨公臺榭侈費民力殫窮邊師生事士無廉恥釋老害教朝綱未正法度未清役法未均水旱頻仍略不聞力言縱言之不聽未見緣言事而出者低回苟祿以要大用今所力言者不過暴斥垂簾之事多形瑣碎之言一切迎合亦未容

全是也仁皇初即位嘗詔內外不許言太后垂簾日事
詔之大略曰太后保佑冲人十餘年間四海安靜紀綱
不亂今言事者多挾情迎合罔識遠圖靡循理體今後
不得輒有上言庶永先猷式敦教本此詔最為近厚紹
聖以後臣嘗觀陛下有詔謂垂簾時事及元祐大臣有
一切勿問之語與仁皇詔書意合然而進用之人既盛
日與仇人為敵欲其必死而後已又希進干祿求媚取
悅之人不言元祐之失則為背馳陛下雖有此詔其實

臣下不行陛下之詔意中書樞密今所謂執政官有六人而閩人居其五先王之時取賢無方或取於漁鹽或取於耕築或取於仇讐未聞止於取一路也中書侍郎許將元祐為翰林學士一日獨班宣見明日除尚書右丞蔡確南行之日也今尚書右丞黃履在元祐為御史中丞凡涉數年不知所救何失所爭何事設言之不行則亦不可已矣尋以事為他人所攻罷職不知履何以自處或以先朝嘗以善財利稱而今復用或以詞誥善

罵而擢之要近如昨被責閹官不唯牽復更加寵用此輩只宜備使令不當使預中書政事願陛下察視多士惟賢是用潛消朋黨悉為王臣招致直言虛心悔省法度求當無問新舊天下幸甚所謂廷臣好談兵邊帥喜攻戰者臣試言之今急功利之人多無遠慮但務以雪恥為名挑剔起事徑入築城士卒不得休息轉輸絡繹於道臣恐勤兵勞衆雖得所侵舊境邊田無所用之所可憂者在乎內地也莫易於取之莫難於守之芻糧器

械積之府庫適為其所資也以臣所見不若謹備自治
以待之其太盛不軌之甚則戰戰之有名無有不勝其
次俟其少衰當自歸服如趙充國之屯田以不戰勝之
也陛下自免西顧之憂有榮無辱然後選忠厚政事智
敏老成之人為之帥則得民之心一可當百兵懦馬飢
用無紀律雖駟而使之戰百不當一今鍾傳江外書生
始為閹人李憲門客因緣得官素號輕浮今以一方重
事委之又以館職誘之可攻可戰有進有退不能臨事

而懼好謀而成不唯無功恐辱國命熙寧初富弼議事不合罷相去之日告先帝曰陛下二十年莫說用兵王安石五事書一曰和戎是皆天下安靖肥富而後可以言兵也所謂莫說用兵者非不為兵備其意謂先帝熙寧初即位未久歷事未多天下未富未可輕用其民逮元豐間陝右五路進兵有靈武之不利永樂築城有徐禧之敗事先帝謂在廷輔臣曰作事如此之難邊奏至屢為泣下信乎邊事不可容易民之死生國之安危君

之榮辱係焉不可不知也臣前謂太盛不軌則戰戰之有名無有不勝此自投禍也故取之易其次俟其少衰自當歸服此前世驗也凡言禦西戎之策多以斷西北交結之勢漢武帝命衛霍屢空其巢穴列為張掖酒泉武威燉煌等郡魏晉以下赫連等互據西河涼州之地奄有靈夏唐開西域始復其地置都護節度僖宗以後例授功臣五代擾攘封李仁福為西平王我太祖經略四方未暇遠略故曩興尚世襲領節鉞至四世外繼遷

叛盡據夏宥銀綏之地淳化中始納款歸服太宗易姓
改名籍于宗正至道中復叛景德中又叛其子德明尚
孤幼又值契丹北和無以為援懼我朝廷併取乃堅上
表以示臣服真宗慈仁寬量不惜靈夏數州之地遂以
為定難軍賜以西平王號使當時乘其勢衰力敗有攻
必取建州邑置靈武安西都護府擇帥之賢者且制且
撫則沿邊鄙延環慶不復有今日之患其間元昊僭號
遣楊守素入朝納旌節犯延州執劉平石元孫又入渭

州界好水川殺葛懷敏輩臣以所見戎虜叛服往來不
常正如虎豹之性不足恠也德明之衰弱可以攻取而
不取元昊之僭可以問罪而不問所以養成其惡也今
西戎謂之盛則有罪謂之衰則不臣宜選帥訓兵謹備
斥堠俟之歲月彼當自屈服歸疆然後置都護府廣開
營田足食足兵攻守兩得以求國家之利天下幸甚臣
所陳四說願陛下稍霽天威容納而行之負薪之賤或
有廊廟之語陛下自視孰與成王賢且成王有周公旦

為師召公奭為保又有閔散之徒朝夕講道明義為欲
致其君於堯舜之上身不比嬖佞纖巧之小人耳不聞
近習小利之邪說目不覩爭地兵戰之危事聲色者不
得惑游畋者不得作貨利者不得萌德已進矣尚猶有
訪落之謀廟小毖之求助七月之陳王業公劉之戒民
事無逸之戒盤游無諫不從無言不聽而召公尚有
不悅憂主之意如此乃能君臣相濟上下維持以成太
平今近臣則爭曰陛下聖德已成羣臣皆所不及無用諫

諍言事之臣又不過指斥一二差除小事與今日不得志之人於國家大利害天下之大本末未聞議論今左右倚為廟堂之柱石者為誰賴以為醫工之藥石者為誰為陛下之股肱耳目者為誰恭惟先皇帝德業茂盛播在四海陛下當思所以繼之之難不宜輕信偏聽容易持守詩書之所責備成王者謂文武之業難繼也仁宗皇帝所以享國四十餘年內外無事以能聽諫諍也唐陸贄好諫自謂上不負天子下不負所學言之苟利

於國有補於君臣雖死不恨晉靈公冬寒鑿池宛春諫之謂鑿池天寒以春之言罷役則是怨歸於公恩歸於春靈公曰宛春有善寡人能用之春之善則寡人之善也遂罷役裴延齡佞人帝欲相之陽城等詣延英門論爭伏閣不去帝怒左右懼不測金吾將軍張萬福大言曰國家有直臣天下無慮矣吾年今八十與見盛事臣學術淺言無文采發於孤忠言無忌諱願陛下萬幾之暇少賜睿鑒幸而采擇念祖宗艱難之業除去四說

之患若稽先王之道以措之當時非獨臣幸實天下之

幸

紹聖四年九月
上時為縣令

上徽宗荅詔論日食

韓宗武

元符三年三月二十五日朕以眇身始承
天序任大責重固知攸濟永惟四海之遠
萬幾之煩豈予一人所能徧察必賴百辟
卿士下及庶民敷奏以言輔予不逮矧太
史前告曰天將動威日有食之期在正月
變異甚鉅殆不虛生夙夜以思未燭厥理
將以彌綸初政消弭天災自非藥石之規
孰開朕聽况今周行之內人有所懷芻蕘
之中言亦可採凡朕躬之缺失若左右之
忠邪政令之否臧風俗之美惡朝廷之德

澤有不下究閭閻之疾苦有不上聞咸聽
直言毋有忌諱朕方開謹正之路消壅蔽
之風其於鯁論嘉謀唯恐不聞而行之行
之唯恐不及其言可用朕則有賞言而失
中朕不加罪朕言唯信非事空文尚悉乃
心毋悼後害應中外臣寮以至民庶各許
實封言事布告
邇遐咸知朕意

臣伏覩詔書以日食正陽之月天下臣庶得以實封言
事臣退而伏思以謂人君敬畏天象治古盛德夫日食
星變山崩湧泉天地所以警戒宜以人事察其幾微自
古危亂之國當其未危未亂必有事之先見者忠臣義

士未嘗不發憤流涕道于當世之君事之微漸則人情
所忽亂之既生又悔無所及臣竊惟近日之事亦有微
漸而不可不察者夫大臣不畏公議私結朋黨小臣趨
利附下遺忘朝廷國可危也人主怠於政事言路壅絕
威柄下移怨讟上歸國可危也左右謀議無儒學輔拂
之士守邊捍難無扞城禦侮之臣國可危也開大境土
外連邊患財用耗匱民力凋弊國可危也歲穀不登倉
廩空虛民人流亡盜賊數起國可危也先帝踐祚之初

母后共朝政出房闥委任大臣紹聖之後神考法度未
及盡舉而根治朋黨追復私怨中外觀望言者同罪追
貶竄逐流離道路正士廢黜耆老殲亡附下罔上相排
擯以為進身捷徑縱有特立之士一二敢言者一身流
放旋起大獄害及善類歸咎先帝虧損至德自侍從官
至百執事非執政親黨不得進每一官闕輒闕不補豈
以四海士人之富朝廷百官之衆空乏如是耶侍從官
職在獻納頃年以來未嘗有一敢言事者畏大臣為身

謀耳竊受重祿被服冠帶出入禁省朝廷何賴焉文章
號令衰於前朝劇藩重邊多非其人狂士獻說驟冠三
軍進築生事不計國費虛增首級妄邀厚賞猥稱招降
陷沒驍將羌人所過供帳犒設道路騷然自陝以西斗
米數十金泉法低昂無術以掾重加困擾戎落不顧士
馬疲弊夫關西天下之形勝也使民力內虛外遺邊患
朝廷何以禦之邊境一搖陝右危矣河北山東天下之
腹心也大河決溢飢饉相仍老幼扶攜散而之四方者

不可勝數其餓殍填委溝壑者以百萬計或至父子相食州縣無以賑給坐視其死亡或以郡守非其人朝廷罷去後來者率皆以私意除用或不及前人尚何賴其拊百姓為朝廷究陳利害河事雖廢責之水官至今未見圖利安之策堪受其任者執政大臣無憂國忘家為萬世之慮豈人有腹心之疾得高枕而卧耶所恃以為安者北寇敦固盟好邊鄙不聳此豈中國可亡備耶易曰其亡其亡繫于苞桑自商號至伊陽六七百里山巖

重複林木蔽密中間無郡縣城郭逃亡所聚不啻數千人萬一有桀惡者相扇而起其患豈小哉臣每見朝廷更革政令但人懷異意排去舊怨以立新黨徒為紛紛未有講究治具建不拔之基為國家者也國是未定殆為此也誠願明天子躬攬乾綱收還威柄公卿大臣圖畫政體當今所宜施行因求賢知足以濟務者隨才錄用無間新舊敷言奏功考察名實中外之任更番迭處使勲業著見朝廷尊光君臣同福海內被澤太平之烈

豈不偉哉聖人以天下為度聰明惠澤如日月雨露顧
不以小惠小察而自足也安不忘危治不忘亂不以天
位崇高幸天下無事而宴安也以四海之內一夫失所
為憂不以侍御之好鐘鼓之娛為樂也大約人情泰然
無患久則放佚生焉願陛下思大禹寸陰之戒慕漢丈
惜百金之費儲思留神日謹一日如太陽朝升至於豐
融以照天下誦帝堯知人之哲稽洪範威福之正仁祖
惻怛至誠以結天下之心神考勵精不息以舉天下之

事此陛下之所宜法也臣在神宗皇帝時屢蒙清問未嘗敢獻一言今至白髮非以僥倖美官厚祿特以世受厚恩誠惜當平治之世不慮安危之機而徒為此紛紛也小臣謀國大體罪當砧鑕昧死以聞

元符三年四月
上時為鴻臚寺

丞

上徽宗論應天以實

王渙之

臣伏以求言非難聽之難聽言非難察而用之難求而不能
用非所謂應天以實者也臣竊見國家每有天變

輒下求言之詔畏天愛人可謂至矣而下之報上乃或不然以指陳闕失為訕上以阿諛諂佞為尊君以論議趨時為國是以可否相濟為邪說其於大臣權要則觀望附會相戒以默志士仁人知言之無益也不復有言而小人懷奸僥倖肆為詭譎可駭之論以為偷合苟容之計此尤不可不察也願陛下虛心公聽言無逆遜惟是之從事無今昔惟當為貴人無同異惟正是用如此則人心說治道正天心得矣

元符三年四月上時以樞密院編修召對即除吏部

員外郎

上徽宗論星變

陳瓘

臣近聞衆論火星之行頗失常度歷氏犯房今乃在房心之間臣竊考歷代天文志熒惑犯房將相惡之若房心之間則天子之明堂也臣雖不曉天文然而房心兩位最為易見恐太史占知有所隱避不敢盡奏臣不可以無言也臣伏聞仁祖之訓曰國家雖無大異亦當常自修警況因謫見乎

貼黃心為宋之分野火星乃天王之位前星乃太子之位今幸未陵犯臣先事而言者亦冀有補而已自陛下即位以來正陽之月日有食之肆赦求言所以圖消復也而星變繼作厥異甚大安可以不思其故哉董仲舒曰國家將有失道之敗而天乃先出災害以譴告之不知自省又出怪異以警懼之尚不知變而傷敗乃至以此知天心之仁愛人君而欲止其亂也陛下聖德日躋切於至治上

法祖宗內稟慈訓孜孜勉勉不敢皇暇而日星之
變重有譴告非天心仁愛之深何以得此草否為
泰轉災為祥在陛下一念之頃耳臣聞應天消變
不在文采非祝禳之除也

又貼黃齊有彗星齊侯使祝禳之晏子曰無益也
祇取誣焉天道不諂不貳其命若之何禳之也且
天之有彗以除穢也君無穢德又何禳焉若德之
穢禳之何損詩曰惟此文王小心翼翼昭事上帝

聿懷多福厥德不回以受方國君無違德方國將
至何患彗詩曰我無所監夏后及商用亂之故民
卒流亡若德之尚亂民將流亡祝史之為無能補
也公悅乃止非末術之所去也宋景公仁人之言
而能使熒惑退舍者非空言而已也根於誠心而
發於言也

又貼黃宋景公時熒惑在心公懼召李子韋而問
曰熒惑在心何也子韋曰天罰也宋分野曰禍當

君身雖然可移於相公曰相所使治國也而移焉
不祥子韋曰可移於歲公曰歲饑民餓必死為人
君欲殺其民以自活其誰以我為君乎子韋還走
北面再拜曰臣敢賀君天之處高而聽卑君有仁
人之言三天必賞君今夕星必徙舍是夕也星三
徙舍如子韋言老子曰能受國之不祥是謂天下
之王也咸平元年二月彗出營室北真宗謂宰相
曰其祥安在呂端等言變在齊魯之分真宗曰朕

以天下為憂豈獨一方耶其年十月遂用李沆為
宰相王旦為參知政事此二人者天下之所謂賢
也舉天下之賢而用之則可以解天下之憂真宗
消變之術如此而已臣願陛下用真宗消變之術
察朝廷未正之事勿牽眾論取其皆合人心則合
天心矣漢元之時蕭望之周堪張猛等與石顯許
史之徒議論交戰邪正未決當此之時有夏寒日
青之變而許史之徒以為堪猛用事之咎於是勢孤

者危有力者勝臣嘗以謂天下大器也譬如一舟
舟平則安舟偏則危自紹聖以來宰舟之人實右
而虛左舟勢不平幾於傾覆觀者膽落亦已久矣
自陛下即位以來好平惡偏選同濟之人採旁觀
膽落之語廣諏博訪而審其所以然也且星文之
變昭示天下已數日矣惟京師陰雨見之最晚則
是遠方之所已知而陛下有未知也幸而蒙蔽忽
開陰雲披剝垂象絜示陛下天心仁愛可見於此

傳曰人之所欲天必從之決去姦佞改用忠良以合人心之所欲天意得矣臣故曰草否為泰轉災為祥在陛下一念之頃耳臣愚不知忌諱惟陛下裁赦幸甚

又貼黃淳化二年熒惑犯房其年宰相呂蒙正樞密使王曉參知政事王沔陳恕皆罷而改用寇準等太宗以是年大旱延近臣問時政得失樞密直學士寇準對曰天人之際應如影響大旱之徵盖

刑有所不平頃者祖吉王淮皆侮法受贓吉既伏
誅家且籍沒而淮以叅知政事汚之弟止杖于私
室仍領濠州定遠主簿用法重輕如此亢暎之咎
殆不虛發也太宗大悟明日見汚切責之是歲擢
準樞密副使徙同知樞密院事今陛下左右之臣
在紹聖中負誣神考讐毀宣仁而不能奉承哲宗
繼述之意同心合謀非一人也願陛下躬攬之初
速正其罪且無使有僥倖苟免之人則用法輕重

不至于不平矣消弭天變莫大乎此臣願陛下以臣此語深加意慮

又貼黃臣竊聞仁祖嘗采前世災異有應者編次為十二卷御製序引名曰洪範政鑒遇有天變則考其所因以為修省之資今其書必在禁中臣願陛下法仁祖之寅畏留意修省以福天下

元符七年七月

上時為
右正言

上徽宗論天象乞申勅太史無有諱避

鄒浩

臣聞天人之應捷於影響苟知其故而豫處之則轉禍為福斯不難也神宗皇帝嘗謂輔臣曰事之將兆天常見象但人不能知彗孛示人事甚直猶如語言顧今無深曉天道之人耳古人能知之則能消伏又曰事將萌而天象先見蓋人事在下氣積於上積衆人之氣而先見猶人之五臟有疾病而氣色見於面矣非神宗皇帝至神至聖豈能及此此人主之所宜遵用也臣愚欲望

睿慈申敕太史無有諱避悉以所占密具奏聞從而察之以正厥事以為曲突徙薪之計天下幸甚

元符三年七月上時

為右
正言

上徽宗論赤氣之異

任伯雨

臣伏覩陛下自臨御以來德澤屢下和氣充塞曰雨而雨曰暘而暘四海九州罔不豐年天心人意如合符節固宜乖氣異象消伏不作然去年四月朔今年正月朔莫夜赤氣起於北方光焰亘天又有黑風在下漸衝西

方散而為白咎徵之來其異如此天心之愛陛下欲陛下有所恐懼戒謹也且正歲之始建寅之月其卦為泰年方改元時方孟春月居正首日為壬戌是陛下本命而赤氣起於莫夜之幽以一日言之日為陽夜為陰以四方言之東南方為陽西北方為陰以五色推之赤為陽黑與白為陰以事推之朝廷為陽宮禁為陰中國為陽夷狄為陰君子為陽小人為陰德為陽兵為陰今赤氣起於至陰之方又有黑氣下起此宮禁陰謀下干上

之證也漸衝正西散而為白而白主兵此邊寇竊發之證也臣謹按前漢五行志云視之不明是為不哲時則有赤青赤祥又曰不明善惡親昵近習無功者受賞有罪者不殺時則有赤祥其說蓋出於洪範五事故唐世自大厯貞元寶厯間屢有赤氣之異惟文宗太和中為多是時宦官用事朋黨交結今日陛下堯舜之資當千載盛明之時固非唐世哀末之比然天心愛陛下以災異為警戒不可不深思遠慮也臣伏願陛下收主柄抑

臣下嚴敕宮禁以防慮幾微訓飭將帥以遏絕生事用
忠良黜邪佞正名分殛姦惡事至必斷無以寬仁傷大
義使陰邪小人無生犯上之心則變異之起可轉為休
祥矣臣疎賤小臣誤蒙陛下拔擢於衆人之後付以言
責常恨粉身碎首未有補報若見災異畏罪不言不惟
虛陛下聖神知遇孤負大恩抑恐有佞臣指為祥光瑞
氣以欺聖聽使陛下畏天小心不得即日恐懼消變則
臣之大罪甘銖鉞不足以謝言責伏惟陛下留神采聽

天下幸甚

貼黃臣所奏為言赤氣事按前漢五行志謂之赤
眚乃災異之變唐世屢有此異史臣具載其狀亦
謂之赤祥臣推考象類乃陽不制陰下干上之證

建中靖國元年正月上時為右正言時輔臣對垂
拱殿上曰元日之夕有赤氣起東北彌亘西方久
之中出白氣二及赤氣將散復有黑祲在其旁災
變之來甚可懼也尚慮天文官掩匿諛順不以實
言遂申救之乃謂於法主暴兵因顧知樞密院安
燾曰遠則邊塞近則內郡皆宜嚴視兵防以謹天
戒輔臣皆頓首曰敢不奉詔門下侍郎李清臣曰
從前多惡聞災異故史官或不敢奏今陛下畏天

象戒懼如此
天下之幸也

上徽宗論赤氣之異

條第
二狀

任伯雨

臣伏見今月初一夜赤氣未半月果有皇太后上僊之禍其為災變亦已明矣今來亳州兗州河中府奏言因建置道場獲此祥應且赤氣所起天下皆見如何敢移易方位增添景象公肆欺誑以愚羣聽竊以天人之際道固幽遠災祥之出殆不虛示豈佞夫纖人敗壞大體詭詞異說指災為祥以輕侮天命幻惑人主若縱而

不治則姦諛相師此風不可滋長伏願陛下嚴賜黜責

以戒百官

建中靖國元年正月



宋名臣奏議卷四十四